

Uunga siunnersuut: Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata allangortinneqarneranik Inatsisartut inatsisissaattut siunnersuut

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Aappassaaneerera

Aallarniutigalugu Naalakkersuisut sinnerlugit ataatsimiititaliaq isumaliutissiissut pillugu qutsavigissavara, ataatsimiititaliap isumaqatigiittup siunnersuutip akuersissutigineqarnissaanik inassuteqaataat pillugu.

Ataatsimiititaliap isumaliutissiissummini Naalakkersuisut kaammattorsimavai ataatsimiititaliap siunnersuutip aningaasartaanut tunngasumik oqaaseqaataanut isummersoqqullugit. Tamanna naatsumik oqaaseqarfigissavara.

Nalinginnaasumik nassuiaatini nalunaarneqartumut naatsorsuutigineqartoq inuussutissarsiutinut ilinniartitaanerni ilinniagaqartut taamaatiinnartartut annikinnerulernissaat, tamatumalu kingunerissagaa ilinniagaqarnersiutinut, ilinniagaqartut ineqarfiinut il.il. atuineq annertunerulissasoq. Tamannali aamma illuatungeqassaaq amerlasuut kingusinnerusukkut ilinniakkamik allamik aallartitsisarnerannik, taamalu piffissami sivisunerusumi ilinniagaqarnersiuteqartarnerannik, ilinniakkap pineqartup atuiffiusarneranit takinerusumik. Inuussutissarsiutinut ilinniakkanut ataasiakkaanut ingerlatsinermut aningaasartuutit eqqarsaatigalugit, taakkua ataatsimoorussamik hold-ikkaanut taxameterimut akiliutinik tunngaveqarput. Taamaatiinnartartut ikinnerulernerat taamaallaat annikitsumik hold-it amerlinissaannik pisariaqartitsiviussaaq, taamaattumillu taamaatiinnartartut ikinnerulernerat ingerlatsinermut aningaasartuutinut sunniutaa annikitsuinnaassalluni.

Ataatsimiititaliap siunnersuummi nr. 6-imut nalunaarsimavaa naatsorsuutigineqassasoq taanna aningaasartuunik kinguneqassasoq. Tamatumunngalu atatillugu ilisimatitsissutigineqassaaq malittarisassat sakkukillineqarnerat aningaasartuunik kinguneqartussaangimmat, inuussutissarsiutinut ilinniartitaanerni pikkorissartitsinerit peqataanermut tapiissutinik pissarsisarneq eqqarsaatigalugu. Inuussutissarsiutinut ilinniartitaanerit iluanni pikkorissartitsinerit aningaasaliissutit ukiumoortumik aningaasanut inatsisikkut aalajangersarneqartarmata aalajangersakkanik sakkukillitsisineq aningaasartuutitaqanngilaq. Ilisimatitsissutigineqarsinnaavoq ukiuni kingullerni aningaasaliissutini atuinikinnerusoqartarsimammat. Taamaattumillu Naalakkersuisut naatsorsuutiginnigilaat siunnersuuteqassallutik inatsimmi allanguinerup kingunerisaanik aningaasartuuteqarnerulernissamat. Naalakkersuisut naatsorsuutigaat aningaasaliissutinik iluaqutaanerusumik atuisoqalissasoq, kiisalu pikkorissaanerit

ingerlanneqartussat allaffissornikkut sullinneqarnerat annikinnerulissasoq. Tamannalu tunngaveqartinneqarpoq inuussutissarsiutinut ilinniarfiit inatsimmik allannguereernikkut qinnuteqartut ataasiakkaat ilinniarsimanikkut tunuliaqutarisaannik uppernarsaasussaajunnaassammata, AMA-mut tapiissutinik tunineqarnissamut atatillugu.

Ataatsimiititaliap apequtigisaanut inuussutissarsiutinut ilinniartitaanernut inatsisip aamma oqaasileriffik pillugu inatsisip sutigut ataqatigiinnerannut tunngatillugu ilisimatitsissutigineqassaaq oqaasileriffiup ingerlatsinera nalinginnaasumik inuussutissarsiutinut ilinniartitaanernik ingerlatsinernut inatsisitigut aqunneqarsimassagaluartoq.

Kiisalu ataatsimiititaliap aamma nalunaarsimavaa Naalakkersuisut isumaliutigisimagunangikkaat siulersuisut atorunnaarsinnerisa tamatumunngalu atatillugu allattoqarfeqarnikkut ikiorsiissutissat aningaasatigut kingunerisassaat, Oqaatsinik Pikkorissarfik pillugu Inatsisartut inatsisaannik atorunnaarsitsinikkut. Tamatumunnga oqaatigineqassaaq Naalakkersuisut siunnersuut saqqummiummassuk oqaatsinik ilinniartitsinermut atatillugu ingerlatsinerup sumi inissisimanissaanut tunngasuni eqaannerusumik periarfissaqalernissap aqutissiuunnissaa. Naalakkersuisut tigussaasumik naatsorsuutigaat 2017-imut aningaasanut inatsisissamut siunnersuummut atatillugu Oqaatsinik Pikkorissarfik ingerlatsivittut immikkoortut nammineertutullu atorunnaarsinneqassasoq. Tamatumunngalu taarsiullugu naatsorsuutigineqarpoq oqaatsinik ilinniartitsinermi suliniutit inuussutissarsiutinut ilinniarfimmi gymnasiami ilinniartitaanernik ingerlatsisumi inissisimalissasoq. Tamanna siunnersuutigineqarpoq qularnaarumallugu eqaallisaanissaq pisariillisaanissarlu oqaatsinut suliniutini pikkorissartitsisarnernilu allaffissornermi. Inuussutissarsiutinut ilinniarfiit gymnasiami ilinniartitaanernik ingerlatsisusut maanna oqaatsinut tunngasunik nukittuunik avatangiiseqareerput, kiisalu eqaatsumik ingerlatsisunik pikkorissaasarnernut allaffissornikkut ingerlatsisoqarlutik. Naalakkersuisut siunnerfiginngilaat oqaatsinik ilinniartitsinermi aningaasaliissutaasut annikillineqarnissaat, suliasaqarfimmilu tassani aningaasaliissutit 2017-imut aningaasanut inatsisissatut siunnersuummi immikkoortut takuneqarsinnaassapput. Naalakkersuisut naatsorsuutigaat allannguinnissap siunnerfiusup kingunerisaanik naammassiat qaffasinnerulernissaat pitsaanerulernissaallu, aammalu aningaasaliissutaasut iluanni ingerlatsinerup malunnaateqarnerulernissaa.

Nassuiaatinilu teknikkikkut naleqqusaanissamut aqqissuussinerni tunngatiillugu, kiisalu § 1, imm. 3-mut oqaaseqaatit amigaataasut eqqarsaatigalugit Naalakkersuisut taakkua siunnersuutip pingajussaaneernejarnissaanut atatillugu allannguutissatut siunnersuuteqarfiginiarpaat.

Naalakkersuisullu aamma ataatsimiititaliaq qutsavigissavaat oqaaseqaataat pitsaasut siunnerfeqartullu eqqarsaatigalugit, taakkualu suleqqinnissatsinni ilanngullugit atorumaarpagut,